

**Wrkapm a Pol nira eng tu
Kolosi
Krais pa tukgunakg eng kweikwei
wrongkwail, wa kil antiwe
nikgwalpm wor a Maur Wailen
nampokgen yaprekg watin eng
rpma wor yongkyong**

(Klapm 1:1-3:4)

¹ Kupm Pol, melnum a pikekg Maur Wailen kil takweiyopm ak wasrongen alkil atom ukwawopm kai akwap a Sisas Krais, wa nampikgen Timoti, melnum wor akupmen a mentekg ukipma Krais.

² Mentekg nira wrkapm kil kai eng kipm wrong kin kipman a Maur Wailen a rka kai anong Kolosi, kipm melnum almentekgen a ukipma Krais. Mentekg oklala naki Maur Wailen, Yan amentepmen eng mpa kil plantepm ipma wor akilen ik ngklinsepm atom ntokg kipm rpmi nimpokgen ipma meen wor.

Pol oklala naki Maur Wailen a ukwor kil

³ Mentekg akangklei uk wor Maur Wailen, Yan a Wailen Sisas Krais amentepmen, ak wang a mentekg oklala naki Maur Wailen eng kil ngklinsepm.

⁴ Mentekg ukwor Maur Wailen pati atnen a mentekg atning a kipm ukipma Krais Sisas a wa

kipm plan ipma wor wasrongen tu wrongkwail kin a kipman wriwen wor a Maur Wailen pa.

⁵ Kipm ukipma ariwe rpma nungkwangen la ikga ngkwrerng kruitn a kweikwei wor wor a Maur Wailen kil numprampen iggalen elng itna kaino anong wor ai. Kipm pikekg atning katnun yangkipm wor aklale wrisen a Maur Wailen pa atom, kipm ukipma rpma nungkwangen pake.

⁶ Pikekg tu melnum aye yangkipm wor pa aye kaintepm. Yangkipm wor pa kai yela anong kanokg wrongkwail ti, atom palng wail anip wor kaino wail angko okarke yela kanokg ti ise. Am kol pikekg ep kipm atning kai anong akipmen pake. Kipm atning yangkipm wor aklale a la nikgwalpm wor a Maur Wailen plantepm a angklinsepm pa atom kipm atning awi ariwe katnun pa.

⁷ Epapras kaling plantepm ti kipm awi ariwe wor pa. Kil yek pa melnum akwapel nungkulkng wor a Krai amenen, kil akwap wris kolen men ti, kil laron yangkipm wor a Krai pa ak angklin kipm pa.

⁸ Am pikekg Epapras kil pa wa lakati naki mentekg ti la Maur Wor akwap kai kipm pa atom kipm plan ipma wor wasrongen tita pake.

Ukipma Maur Wailen pa itni titnongket

⁹ Kolpa atom ari, ak wang a mentekg atning a tu lakati kipm pa pipa, ake wa mentekg elngen a akwen Maur Wailen eng la kil ngklinsepm pa.

Mentekg asentel eng mpa kipm uwi riwe kweikwei wrongkwail a kil wasrongen pa kimeket, eng mpa ik ngklin Maur Wor akipmen ti uwi riwe a nkgwalpm wontrakole worwor wrongkwail pa.

¹⁰ A wa mentekg oklala naki Maur Wailen eng mpa rpma akipmen pa mpa palng wor itni wulmpa a Wailen. Wa kipm uwi ariwe a Maur Wailen pa atom kipm ik ik kwap wor eng kil pa, pa kol kipm angko ok wor kai kweikwei a worampe i a kipm antokg pa, eng mpa Wailen kil kipornng yangkipm.

¹¹ A wa mentekg oklala naki Maur Wailen eng mpa kil ik titnongketel kipm pa kai ya watipmen ik titnongket klalen wail manten akilen pa, atom ti kol kaikuten tiur a la palngtepm pa, kipm antiwe rpmi meen rki kaikuten pa nimpokgen ipma itopen pa.

¹² Mentekg oklala naki Maur Wailen eng mpa kipm itopen ngkit nang a Yan Maur Wailen pa iye kaino kwa lkel wor eng kil antokg kipm antiwe awi kweikwei wor wor alkipmen a kil numprampen eng tu wrong kin a kipman alkilen itna kaino anong akilen ai.

¹³ Maur Wailen kil unkwang titnongket a Satan itna wailen ikgalen nol nkgwalpm amentepmen a yapowo kai miningket pa kai takwlelkg, a kil awiyo kai pa aye kul kai eng Warim Kipman alkil a kil plan ipma wor wasrongentel pa itna wailen ikgalen nol nkgwalpm amentepmen.

¹⁴ Warim Kipman pa kil akarmpen paipm-

paipm a mentepmen plalng ise, atom unkwaw paipmpaipm a mentepmen.

Krais itna Wailen eng ikgalen kweikwei wrongkwail

¹⁵ Mentepm ake antiwe mpa ri Maur Wailen, pake mentepm ari Krais pa am ari irir kol Maur Wailen pake. Kil pa warim i alkil am pikekg rpma ep ak ai rpma pake, a kitnong a kanokg a kweikwei wrongkwail ti pa pikekg palng katnukg.

¹⁶ Maur Wailen am anti kil pake antokg kweikwei wrongkwail: kweikwei a itna kaino kitnong ai, a itna kanokg ti, kweikwei a ari ak wulmpa, a kweikwei a ake antiwe ari, tu mring, a mring maur, a maur a antiwe titnongket, a tu a itna tukgunakg ikgalen kanokg ti. Kweikwei wrongkwail pa pikekg Maur Wailen anti Krais pa antokg pake, wa kil elng kweikwei wrongkwail pa orngwatneikgen ngkat nang a Krais pa.

¹⁷ Kil pikekg rpma ep ak ai, a kweikwei wrongkwail ti pa palng katnukg. Atom kil alkil pa wamparpme kweikwei wrongkwail pa ikgalen aye itna.

¹⁸ Mentepm wrongkwail kin a kipman a Maur Wailen pa, mentepm kolen numpwam akilen. A kil alkil pa tukgunakg a numpwam ti. Kil pikekg amo pake kil wa wrekg akwule ya eng tu melnum a amo amo pa ikga wa wrekg wrekg, kil alkil pa itna tukgunakg eng kweikwei wrongkwail.

¹⁹ Maur Wailen pa kil atopen la, atn a rpma a nim a nol a kwap a kol a kil ti ik pa, am Warim

Kipman alkil pa ak plan kil tike. Kolpa atom kil ti am rpma kawor Warim Kipman alkil pake.

²⁰ Maur Wailen lam kla eng akawi kweikwei wrongkwail a itna kanokg ti a itna kaino kitnong ai aye kai or wris aken tita or ya a Warim Kipman alkilen pake. Kil ukwawel amo kai yo okgmangki pa atom walmpopm a kil pa unkwawan atom ak unkwawan ipma wakget a Maur Wailen itna eng mentepm wrongkwail pa kai palng.

²¹ Kipm pikekg ep pa, kipm pikekg itna kai watin ai antokg paipmpaipm awi wrongmanto lan Maur Wailen.

²² Krais kil palng melnum kolen mentepm ti, atom kil amo kai yo okgmangki ak unkwawan ipma wakget a Maur Wailen itna eng kipm pa, atom kil antokg kipm ti palng wriwen wor, paipmpaipm kalpisen, itna wulmpa a Maur Wailen. Wa ake antiwe mpa mla ur rkiwepm la kipm paipm pa, kalpis.

²³ Pake kipm mpa ukipma Maur Wailen pa itni titnongket kolen yo a angkli yapoko elng kinar kanokg wunen ai atom arkul kanokg itna titnongket pa. A mpa wa kipm ukipma rpmi nungkwangen kuina ur a kipm atning a tu laron yangkipm wor a Maur Wailen nakepm pa, pa ampur kipm atnuurng. Yangkipm wor pa pikekg laron naki tu wrongkwail kin a kipman yela kanokg ti. Kupm alkupm ti am pikekg palng melnum akwapel a laron yangkipm wor pake.

Pol kil angklin tu wrong kin a kipman a Maur

Wailen a rka Kolosi

²⁴ Ak wang ti pa, kupm atopen eng arki kaikuten eng ak angklin kipm pa. Kupm wa atopen yat eng uk num a kupm alkupm ti kai eng arki kaikuten tiur ak angkine kaikuten pikekg Krai kil arki pa kolpa kai eng ak angklin tu wrong kin a kipman a Maur Wailen pa, tu kolen num a Krai pake.

²⁵ Kupm pikekg Maur Wailen kil takweiyopm ep ak ai, atom kupm palng melnum akwapel akilen eng laron yangkipm wor akilen ti klalen yek kimeket riworwor niki tu wrong kin a kipman a Maur Wailen.

²⁶ Nikgwalm a Maur Wailen kil pati pikekg itna ampen eng tu yoampe i a mamikgmamin mansan ak ai kul ai. Pake ak wang ti pa, kil laron angko wunong eng tu wrong kin a kipman wriwen wor alkilen.

²⁷ Kai tu pa, Maur Wailen kil pikekg yapon yangkipm wasrongen la kil ikga laron nikgwalm a kweikwei waillet wor wor a itna ampen pa kul kai ngko wunong eng tu wrongkwail a ake Suta pa yat. Nikgwalm ampen pa pati, la Krai kil rpma kawor ipma wunen a kipm ti atom ti kipm ukipma rpma nungkwangen la ikga kipm unkwerrng kruitn a kweikwei wor wor akilen ai ri kawor yalming wunen ai.

²⁸ Men laron yangkipm wor pa naki tu kimeket a kaling plan ya wor ak nikgwalm ariwe wor wor a aloken takwleikgen ya paipm. Kolpa mpa men iyewen kai itni wulmpa a Maur Wailen, a tu wrongkwail tu riwen la tu pa rpma kawor

Krais, atom tu aye wrisen nkgwalpm wor wor aworampei a Kraiss.

²⁹ Kolpa atom ari kupm aken kwap nkgwalpm arkekgen timplowis ak titnongket a Kraiss a akwap titnongket tumpulmpis kawor kupm ti.

2

Ukipma itni titnongket tulpulng yangkipm kansil

¹ Kupm wasrongen la kipm riwe la, kupm ampurkg ampenen aken kwap angklin kipm pa a wa tu a rka kai Laotisia, a wa tu a ake ari ikgokg a kupm ti yat.

² Yiprokgen a kupm ak kolpa pati, kupm ak eng la mpa ik titnongketel nol nkgwalpm atuwen pa eng mpa tu rkul nkgwalpm a plan ipma wor wasrongen tita pa, eng mpa tu uwi riwe yek kimeket kai itni yiprokg nkgwalpm ariwe wrongkwail. Eng mpa tu riwe nkgwalpm ariwe ampen a Maur Wailen pa. Nkgwalpm ariwe ampen wrongkwail pa am Kraiss kil alkil pake.

³ Kai kil pa kil melnum yiprokgen a ariwe a nkgwalpm wontrakole worwor pa am rpma ampen kai kil pake.

⁴ Kupm lanakepm yangkipm a Kraiss kil pati, atnen kupm karken ikga wa tu tiur manet ai lkepm yangkipm ur manet a atning wor kai nungkulkg akipmen ti atom, wa ik rkolng kipm ti iye kai or ya paipm pa.

⁵ Kol kupm ake antiwepm rpma, pake nkgwalpm wail akupmen kil pa am arken kipm pa rpma kai pake. Ti kupm atopen eng kupm atning a kipm or wris rpma wor katnun yangkipm a Maur Wailen, a wa kipm ukipma Kraiss pa itna titnongket.

Ukipma Kraiss pa itni titnongket kolpa iye kai o!

⁶ Kipm awi Kraiss kolen Wailen akipmen ise, kolpa ti ampur kipm elngen, kipm kutnun kil pa itning yangkipm kolpa iye kai o!

⁷ Kipm ukipma Kraiss pa itni titnongket kolen yo klung a angkli yapoko ningnangk alkil pa elng kinar ak arkul kanokg ai. A wa kipm ukipma kil pa itni titnongket kolpa iye kai pa, pa kol a kipm itna ale ale wan ela ong kimpowen wor pa itna aye kolpa aye kai. Kol a pikekg men kalingtepm ise. Ti ipma wunen akipmen ti mpa itopen wail manten a wa ukwor kil pa.

⁸ Kipm rpmi riwe wonirpme eng ikga wa tu melnum tiur kinsilepm lokepm iye kai ar, eng kilng plantepm nkgwalpm ariwe kansil a kanokg ti a pikekg tu mamikg mamin mansan awi kai tu mring maur a maur kansil a ikgalen kanokg ti atom kaling plantepm pa, pa ake ariwe wor a Kraiss pa.

⁹ Maur Wailen pa rpma kawor Kraiss. Kil awi numpalk kolen mentepm melnum ti, pake Maur Wailen kil alkil ti rpma kawor wunen a kil pa.

¹⁰ Wa Kraiss pa rpma wail kawor kipm ti atom kipm antiwe antokg kweikwei wrongkwail. Kil

pa itna tukgunakg ikgalen kweikwei wrongkwail. Kil itna wailen ikgalen tu maur, a melnum wail wail a antiwe titnongket pa.

¹¹ Tu angket num a kipm kipman pa, pa tu ungkwan num walmpopm paipm a kipm pa kai takwleikg. Pa kolen Kraiss ungkwan paipmpaipm akipmen kai plalng ise, pa pati ake melnum pa angket num akipmen ak ungkwan walmpopm paipm pa, kalpis, pa Kraiss pa angket pake.

¹² Wa kol tu naren Kraiss kalukepm pa, pa plan kol kipm amo nampokgen Kraiss pa ise, atom uwentepm kai kirkap pa ise. Wa kipm ukipma la titnongket a Maur Wailen pa antiwe, atom kil la atom kipm anti Kraiss pa wrekg rpma. Pa kol pikekg Maur Wailen kil la Kraiss kil wa wrekg rpma pa.

¹³ Kipm pikekg kolen tu a ake alm num pa atom paipmpaipm akipmen pa antokg maur wor akipmen pa am amo ise. Pake Maur Wailen la atom wa kipm wa wrekg rpma nampokgen Kraiss pa pati, kil ungkwan paipmpaipm wrongkwail amentepmen pa plalng ise.

¹⁴ Maur Wailen ungkwan yangkipm titnongket a pikekg itna, atom ake mentepm katnun pati, pa kol a iyewo kai itni yangkipm atom mentepm kol a uwi paipm itnen pa. Pa am kil angketen takwleikgtem kai karkurng rka yo okgmangki ise.

¹⁵ Kraiss kil amo rka yo okgmangki pa kil alok arku ungkwan titnongket a melnum wailen wailen, a a maur a antiwe titnongket a itna

wailen akwap yela pa. Kil awi nang wailen ti uk numpaipm tu itna wulmpa a tu wrongkwail a itna kanokg ti a kaino kitnong ai, pa kil planten la kil itna ep angenten ise.

Ampur katnun yangkipm titnongket a melnum yapon pa

¹⁶ Kolpa ti ampur tu akor la kipm a al wangk-wrisen aki kipm a angklon ake pa, wa akor la kipm a antokg okipma wail al atnen wang wail ur aki, atnen okipma nangnang ur aki, kin a raku aki, kin a wor aki, wa akor la wang wail a kipm rpma eng yapm pa.

¹⁷ Palpa kweikwei a mentepm ari lukgel aki mrangkumpel kolti. Pake aklale ikga palng eng mentepm ri uwi riwe worwor pa, pa ikga mentepm nsil ri pa am mentepm ansil ari kai Kraiss pake.

¹⁸ Ake mpa kipm itning kutnun nikgwalpm a tu mla ur ai a arkolngkep m aye kai takwleikg ya wor a kipm ore pa. Kolen tu melnum tiur a arku tu alntu kalpis okipma uk wang Maur Wailen pa ak plan tu alntu ti la tu pa wor pake. A kolen tu tiur a ari kweikwei a kol a Maur Wailen planten aki, kolen okgwangket wor wor pa, tu ngkat nang a tu alntu ti. A wa tu tiur a kapor kilko alein tu maur akwapel a Maur Wailen pa. Palpa tu kansilepm, eng ntei, tu pa arkul nikgwalpm tingklaket paipm alntu ti a wam rka nol a ngkat nang la, am ya wor wrisen am tu ansil am tike.

¹⁹ Tu pa nanukgen tu alntu ti kai itna takwleikgen Kraiss ti. Kraiss pa kil tukgunakg a

numpwam wrongkwail alkilen pake. Numpwam wrongkwail ti kai almpatne itna num a Kraais. Ningkli ti angkli ore tita ak arkul numpwam wrongkwail ti aye kai itna wris, atom anip ak titnongket a Maur Wailen wrekg wor wail.

²⁰ Kipm am pikekg amo nampokgen Kraais ise eng kweikwei ya tingklaket paipm paipm a itna kanokg ti ise. Atom titnongket a ya tingklaket a katnun itna kanokg ti pa ake wa itna wailen angen kipm ti pa, kalpis. Kipm ti angen pa yat ise. Ti wa antokg kolai atom wa kipm kai orngwatneikgen katnun pa itna erkisen itna pa?

²¹ Kol tu ngkengkep m la, “Ake mpa kipm nungkulkg a wulmpa aki ok a ipma eng kweikwei tiur a angklon ake pa.”

²² Pake kolpa kalpis. Pa kweikwei a kol a mentepm ak arpme. Yangkipm tingklaket titnongket a rpma kanokg a ti kolti, pa ikga kai palng. Palpa melnum ti naki alupmen kaling plantepm kolti.

²³ Kol tu kutnun yangkipm a tu kaling plantepm pa, tu arku tu alntu atn meen a rpma meen kansil plan ak num enen ti kolti. Wa tu uk wleket num alntu ti kalpmler kolti. Tu wrongkwail ariwen pa, pa tu la pa tu katila ariwe wor a kapor kilko alein Maur Wailen, ari pa akentiwe titnongket a ak arku angkeng ipma tingklaket atuwen eng tu elngen nkgwalpm pa.

3

Krais kil antokg mentepm palng weten

¹ Maur Wor akipmen am pikekg amo ise, atom Maur Wailen antokg kipm wrekg rpma malepmen nampokgen Krai. Kolpa ti kipm mpa lok nol nkgwalpm akipmen ti rki eng nkgwalpm wor wor a kweikwei wrongkwail a itna kaino anong wor ai kolti. Kaino anong wor a Krai kil rpma wam wi a Yan alkil awi nang wailen itna ep eng ikgalen kweikwei wrongkwail.

² Lok nol nkgwalpm akipmen ti rki eng ikwonilmpen nkgwalpm wor wor a kweikwei kaino Anong Wor ai kolti. A ake mpa ikwonilmpen nkgwalpm a kweikwei a itna kanokg ti.

³ Maur Wor akipmen am pikekg amo ise, atom ti Maur Wor akipmen wrekg rpma malepmen nampokgen Krai, atom Maur Wailen lam ikgalen ariworwor rpma.

⁴ Krai, melnum a alkepm Maur Wor weten pa kil ikga palng ngko wunong pa, kipm ti yat, kipm ikga palng ngko wunong uwi titnongket klalen wail manten nimpokgen kil.

Krai kil rpma kawor nol nkgwalpm amentepmen atom mentepm palng weten

(Klapm 3:5-4:18)

Mentepm palng kin a kipman weten

⁵ Kipm mpa ilm ipma tingklaket wrongkwail a kanokg ti a akwap kawor ipma akipmen pa imo palng. Kupm la ipma a kol kil: angkli arkul tita aki, antokg kweikwei a kimpilpet a numkropis

a uk numpaipm kamel aki, nikgwalpm wrekg la ntokg kuina ur a paipm aki, ari angkowe kuina ur a mla ur ai, pa am wa irir kolen a kapor kilko alein mring a mring maur a kweikwei waillet a itna kanokg a ti kol la pa maur a kipm pa.

⁶ Maur Wailen kil ipma wakget paipm atom ikga kil uk wleket ntokg paipm tu mlaur a talpulng yangkipm a kil kolpa.

⁷ Kipm am pikekg nikgwalpm kolpa arkulepm atom kipm rpma antokg kweikwei kolpake.

⁸ Kolpa ti, kipm mpa ungkwan nikgwalpm wrongkwail a paipm pa kimeket. Nikgwalpm kolen: ipma wakget, a ipma wrekg or kamel, a nikgwalpm paipm, a aknokgel kamel a numkropis kweikwei pa.

⁹ Ake mpa kipm kinsil mlaur, eng ntei, kipm am pikekg ungkwan ipma tingklaket a pikekg kipm ak kolpa yat ise.

¹⁰ A nol nikgwalpm akwonalmpen akipmen pa am palng weten ise, kolen kipm awi apm maing pa wa nowe. Melnum a pikekg antokg kipm ti pa, am kil antokg kipm palng weten a weten kolpa aye kai pake, atom kipm awi ariwe kil pa worwor, atom ikga kipm palng irir kol kil alkil pa.

¹¹ Kipm a palng weten ukipma atom awi Maur Wor klalen pa, mentepm ake wa manet manet, tu Krik aki, men Suta, tu a pikekg angket num aki, tu a ake pikekg angket num, tu a ak ok manet manet aki, tu a anong kanokg manet manet, a tu a aken kwap kalpmllel orngwatneikgen mring ur aki, tu a rka akwap ak wasrongen alntu. Pake Krai wris

ata pa kil a mentepm wrongkwail atom kil pa rpma kawor ipma a mentepm wrongkwail.

Mentepm mpa plan ipma wor wasrongen tita

¹² Maur Wailen kil plan ipma wor wasrongen kipm atom kil takweiyepm la kipm rpmi wriwen wor eng alkilen. Kolpa ti nol nkgwalpm akipmen pa mpa rki kolkil: mpa kipm ipma wor rein ngklin tita, rku kipm alkipm iye kinar rpmi meen orngwatneikgen tita, rpmi meen rki kaikuten nimpokgen ipma wor.

¹³ Melnum ur la lkepm kaikuten pa, ake mpa wa kipm ikilmpe pa, kalpis. Kipm itopen rki kaikuten pa nimpokgen ipma wor rpmi kolti. A wa kipm itnuurng paipm kuina ur a tu antokg kul kipm pa. Pati atnen Maur Wailen kil pikekg atnuurng paipmpaipm akipmen ise.

¹⁴ Nkgwalpm wrongkwail a wet kupm la ela ep pa wor pake, itna ep angen pa pati, kupm la la kipm mpa rkul nkgwalpm a plan ipma wor wasrongen tita. Pa pati mpa iye kipm iye kai orwris a wa kipm mpa itni titnongket eng kitila nkgwalpm wrongkwail pa riworwor.

¹⁵ Kipm elng ipma meen wor a Kraiss pa itni wailen ikglen nol nkgwalpm akipmen pa. Kraiss kil takwei kipm ti kolen numpwam wris wris ur a kai almpatne itna num wris akilen ti. Atom ti kipm mpa rpmi meen wor a wa uk wor Maur Wailen ikngklei wang kolti.

¹⁶ Kipm ngkleikg a kipm itning yangkipm a laron Kraiss pa atom lupmen iye rpmi, uwi riwe

worwor eng mpa kimp uk ariwe tita, a lok kiling plan tita. Wa kimp ik nangnang a ela wrkapm a Nangnang a Tepit, a kimp ukwor ik nangnang a ak ak eng ak ngkat nang a Wailen, a wa ik nang weten weten tiur a Maur Wor alkepm pa. Kimp ik kolpa itopen ik ngkit nang a Maur Wailen.

¹⁷ Kai kweikwei wrongkwail a kimp antokg pa, kimp oklala aki kimp ikwap pa, kimp ik kolen la pa kimp akwap a Wailen Sisas a wa kimp ukwor Maur Wailen, Yan amentepmen pa, atnen kwap a Sisas kil ak pa.

Atn a rpma a melnum a ukipma Maur Wailen

¹⁸ Kimp kin pa, kimp mpa itning nungkulkg orngwatneikgen kipman alkipm pa. Wailen kil atopen la kimp kutnun kolpake.

¹⁹ Kimp kipman pa, kimp mpa plan ipma wor wasrongen tu kin alkipm pa, ake mpa kimp ntokg tu pa ipma paipm eng kimp pa.

²⁰ Kimp warim pa, kimp mpa itning nungkulkg orngwatneikgen man a yan alkipm pa eng kweikwei a worampe. Wailen kil awi wor lawepm kaporng yangkipm eng kimp ak kol pake.

²¹ Kimp yantin pa, ake mpa kimp or ikle tintangen tu warim alkipm pa ikngklei wang, kolpa pa mpa tu ipma kaikut a rpma la rere a atn paipmpaipm nampokgen ipma kaikut.

²² Kimp melnum a pikekg mring ur armpentepm eng aken kwap kalpmllel orngwatneikgen kil pa, itning nungkulkg ikwap kuina ur kitila

wasrongen a mring alkipm pa riworwor. Ake lala kipm kinsil ik itni wulmpa akilen pa eng mpa kil uwi wor lawepm pa. Kipm ngkirk atom kipm ikwap nimpokgen nol nkgwalpm iklale. Kipm ik kolen la pa kipm ak eng Wailen Sisais.

²³ Kolpa ti, kuina ur a kipm antokg pa, kipm ik nimpokgen nol nkgwalpm iklale, kolen la pa ak eng Wailen Sisais ai, a ake ak eng melnum pa.

²⁴ Kol kipm ariwe la, kipm ikga uwi num itnen kweikwei wor wor a Maur Wailen kil numprampen elng itna eng ikilmpe kwap a kipm ak eng Wailen pa. Pa ake la kipm ak eng melnum ur kolti pa, pa kipm ak eng Wailen Sisais Kraisis.

²⁵ Mlaur a kitn antokg paipm pa, kitn ikga uwi paipm ikilmpe paipm a kitn alkitn antokg. Kil ikgake iye la ur a ntokg paipm ti wompel pa, kalpis. Kil ikga ik kolpa kitila kwap a mentepm ak pa kimeket pake.

4

¹ Kipm mring pa, kipm ikglen tu melnum a pikekg kipm armpen eng la iktepm kwap pa ute wor a irir. Eng ntei, kipm ti wa ariwe yat la mring a ikgalen kipm ti pa rpma kaino kitnong ai.

Kipm oklala niki Maur Wailen pa kolpa kai

² Ake mpa kipm elngen a kipm oklala naki naki Maur Wailen pa. Kipm mpa nkgwalpm rkekgen uk wor kil a oklala nikel ikngklei wang kolpa kai pake.

³ A wa kipm oklala niki Wailen eng ikingklin men ti yat, eng mpa Maur Wailen kil ukulento ya eng mpa men laron nkgwalpm ampen a lakati Krai pa. Am yiprokgen pa atom ari tu awiyopm aye or rpma wan tipmining kil.

⁴ Kipm oklala niki Wailen pa eng mpa kil ngklin kupm ti eng kupm antiwe laron yangkipm a kil ti klalen wor kitila nkgwalpm a kil alkil.

⁵ Kai kuin a tu a ake ukipma pa, kipm mpa itn a rpmi wontrakole. Ya ur okore eng kipm pa, ake mpa kipm kiken wang ur pa kai kalpmllel pa. Kipm mpa plan nkgwalpm wor a Maur Wailen.

⁶ Kipm lala oklala nti tu mla ur ai pipa, kipm oklala meen nimpokgen nkgwalpm wor. A kipm ri tu kai paipm pa, kipm wa la loken, pa kol a ik nokg raro i pa eng kil kai la. Wa yat, kipm mpa riwe a akalmpa akasen a tu asentepm pa.

Pol kil ukwa Onesimus anti Tikikus kai Kolosi

⁷ Tikikus pa ikga lanikepm riworwor kweikwei wrongkwail a palng eng kupm itna kil. Kil yek pa melnum almentepm a mentepm ukipma Krai pa. A wa kil melnum akwapel nungkulkg wor a antiwopm akwap a Krai pa titnongket itna.

⁸ Kolpa atom ti kupm la ukwa kil pa kaintepm eng ikga kil lanikepm kuina ur a palngto itna kul kil, eng mpa kipm uwi ipma meen wor.

⁹ A wa kupm ikga ukwa Onesimus ntiwel kaintepm. Kil yek melnum nungkulkg wor a orngwatneikgen a wa melnum wor almentepmen a

mentepm ukipma Krai. Kil pa am melnum ur a kipm alkipm Kolosi pake. Ikga tuwegk lakiti nikepm kweikwei wrongkwail a palng itna kilke.

Pol kil lanaki tu Kolosi pa la kil nikgwalpm arkonten rka

¹⁰ Aristarkus, melnum wor ur alkupm a mentekg rpma wan tipmining kil nampokgen Mak, nongko a Parnapas, tuwegk la kupm niran-temm la tuwegk nikgwalpm arkontem rka pa. Pikekg kupm lanakepm ep ise la kil kaintem pa, kipm itopen eng uwiyel iye kai wan pa ikglentel riworwor.

¹¹ Sisas, nang wompel akilen pa namput la Sastus, kil pa yat wa alkepm wor. Kai kuin a tu Suta aripm ur a pikekg tu wangketen num a rka pa, am tunteng melnum wraur pa kolti, tunteng kimpilp antiwopm atn akwap angklin tu wrong kin kipman, eng mpa tu uwi Maur Wailen ti itni wailen ikglen nol nikgwalpm atuwen. A wa wail manten pa tunteng wor a ak titnongketel ipma a kupm ti.

¹² Epapas, melnum alkipmen pake, kil wa la la kil nikgwalpm arkontem rpma pa. Kil melnum akwapel a Krai Sisas. Kil akangklei oklala naki Maur Wailen titnongket eng la kil ik titnongketel kipm pa, eng kipm palng kolen kin a kipman wriwen wor a itni titnongket kutnun kitila nikgwalpm wasrongen a Maur Wailen kolti.

¹³ Aklale wrisen, kupm alkupm ti pikekg atning a ari a kil aken kwap wail eng kipm wrong kin a

kipman a Maur Wailen a rka kai pa a wa tu a rka kai anong Laotisia a Ierapolis pa.

¹⁴ Luk, melnum wor almentepm a mentepm plan ipma wor wasrongentel, kil melnum a akwap a i numpet, ekg Temas, tuwekg pa wa la tuwekg nikgwalpm arkentepm rka pa.

¹⁵ Kipm laniki tu melnum a mentepm ukipma Kraisa kai anong Laotisia pa a wa laniki kin nang a tu namput la Nimpa pa nimpokgen tu wrong kin a kipman mapming a ukipma Sisasa a wli rka kaingkai wan a kil pa la, kupm nikgwalpm arkten rka pa.

¹⁶ Kipm ngkleikg wrkapm kil eng kipm wrong kin a kipman a Kolosi pa itning plalng pipa, wa iye kai eng tu ngkleikg niki tu wrong kin a kipman mapming a ukipma Sisasa takwem rka Laotisia wai. A wa uwi ur manet a pikekg kupm nira kai eng tu Laotisia wai, wa iye wli ngkleikg niki kipm Kolosi pa.

¹⁷ Kipm laniki Arkipus pa, ri la eng mpa kil ikglen a ikwap a pikekg Wailen alkel pa ik riworwor kolpa kai.

¹⁸ Kupm Pol, kupm nira wrkapm aimprek kil ak wam alkupmen la, kupm alkepm wor. Ampur kipm woniketen kupm a rpma wan tipmning kil. Kupm oklala naki naki Maur Wailen eng mpa kil plantepm ipma wor akilen ik ngklinsep m kolpa iye kai. Yangkipm akupmen kil am kai kolpake.

Kla Weten A Maur Wailen Lam
The New Testament in the main dialect of the Urim
language of Papua New Guinea
Nupela Testamen long tokples Urim long Niugini

copyright © 2024 SIL Papua New Guinea

Language: Urim

Dialect: main

Contributor: Wycliffe Finland and Finnish Evangelical Lutheran Mission

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-12

PDF generated using Haiola and XeLaTeX on 12 Sep 2025 from source files dated 12 Sep 2025

2e27dc3a-67e0-5642-ba90-804f3df7d2c5